

四庫全書

集部

欽定四庫全書

集部

宋藝圃集卷十四
五

詳校官中書_臣陸 湘

侍讀_臣孫球覆勘

總校官庶吉士_臣何思鈞

校對官編修_臣李堯棟

謄錄監生_臣毛 杞

欽定四庫全書

宋藝圃集卷十四

明 李袞 編

姜特立二首

賀陸郎中放翁

午庭風雨撼高槐一洗城頭十丈埃老子坐間尋句好
故人門外寄詩來勁鋒久服穿楊妙鈍思深斬擊鉢催
請佩左符君未可要聽吟咏發春雷

歲暮直舍感懷

歲暮坐公館永懷時序遷雪消殘臘外春到早梅邊夜色侵烏鵲年光送管絃無人同晤語輸寫賴詩篇

汪藻十六首

同張昌時宿高明寺

幽臥不知覺窗懸寒日初矧伊夜來雨谿聲到吾廬故人挽我出忽往天際書躋險敢自休青山轉籃輿相逢竹間寺共擷園中蔬殘僧誰在亡奄忽十載餘茗果話

疇昔新晴報鐘魚東雷亦已鳴百草苔蘗舒奈何與之
子齒髮日夜疎眷此不能發牽衣更踟躕明朝各回首
世事將焉如

次高郵軍

小雨靜林麓鶉鴉相應鳴移舟漾清深薄晚荷氣生歸
鳥盡雙去潛魚時一驚菰蒲若無人渺渺炊烟橫艇子
檝迎我攜魚薦南烹月出殊未高踈林隱微明依沒會
有處斗掛天邊城

次韻向君受感秋

且欲相隨首宿盤不須多問沫猴冠菊花有意浮杯酒
桐葉無聲下井欄千里江山漁笛晚十年燈火客氈寒
男兒幾許功名事華髮催人不少寬

向侯拄笏意千里肯為俗彈頭上冠何時盛之青瑣闥
妙語付以烏絲欄日邊人去鴈行斷江上秋高楓葉寒
向來叔度儻公是一見使我窮愁寬

書寧州驛壁

過眼空花一餉休坐狂猶得佐名州雖遭龍吏嗤韓子
却喜溪神識柳侯盡日野田行擺捩有時雲嶠聽鈎輈
會將新濯滄浪足踏遍千巖萬壑秋

宿鄴侯鎮 二首

當時踏月此長亭鬢似河堤柳色青今日重來堤樹老
一簪華髮戴寒星

微涼初破候蟲秋露草螢光已不流搔首與誰論往事
星河無語下城頭

龜山上方

度險逢幽處，憑誰寫壯懷。
連甍棲絕壁，孤塔表長淮。
地本吳風接，山今禹績偕。
潮聲從殷寺，竹影自翻堦。
木杪朱欄出，城坳雪浪埋。
乾坤迷枉渚，霧雨泄陰崖。
丹葉經寒在，蒼洲向晚佳。
魚龍宵聽唳，猿鳥晝窺齋。
月滿蟾珠實，霜清磬石諧。
僧盃收柏子，樵徑掃松釵。
左宦書無鴈，南烹菜有鮭。
風烟欺短髮，雲水信殘骸。
竟作何鄉老，虛慚素尚乖。
江湖今在眼，歸合辦青鞋。

巳酉亂後寄常州使君姪

汾水遊仍遠，瑤池宴未歸。
航遷新廟主，矢及近臣衣。
戎馬窺天塹，邊烽斷日畿。
百年寰海地，回首復成非。

古鏡行

我有辟邪鏡，得之咸陽宮。
其陰為天池，一母將九龍。
旁書負圖字，土蝕如旋蟲。
緘以馭雞珍，妙極倻之工。
請言照遠近，十里秋毫空。
豈不鑿脂澤，所貴肝膽通。
問誰為此器，太古非人功。
客聞重歎息，意欲窺靈蹤。
高臺不辭

倚恐客難稱容繩窮匣半啓四室來悲風日車當晝留
羞溢如頑銅森然髮上指凜若臨霜鋒我還撫客手此
豈世寶同揮淚兩無言掩鏡鞞囊中

桃源

祖龍門前神傳壁方士猶言仙可得東行欲與羨門親
咫尺蓬萊滄海隔那知平地有青春只屬尋常避世人
關中日月空萬古花下山川長一身中原別後無消息
聞說風塵因感昔誰教晉鼎判東西却媿秦城限南北

人間萬事逾堪憐
此地當時亦偶然
何事區區漢天子
種桃辛苦望長年

過定香寺

雨痕狼藉龍掛虛
風林岑蔚梟哺雛
一川窈窕水雲國
百家世世封樵漁
鐘來木杪知有寺
杖藜起踏蒼烟孤
溪山清明攬楚尾
臺殿傾圮存唐餘

效李長吉體

玉為蟾蜍水作滴
烏絲欄開寶鴉黑
天孫夜拾瑤草歸

醉舞銀毫鬪春碧
媧皇細鍊崑崙石
海底雲綃弄嬌織
香風暗撲雲錦囊
花史司書青帝國
樓成天下傳消息
喚起虹霓掃東壁

避地函亭野步

今日幸無雨
天空出遙岑
行行不知疲
遂至春江潯
汲路轉籬落
人家在桑陰
平疇漲清波
隴麥如人深
溝畝戲鳧鷖
新蒲映浮沉
我生本漁樵
對此諧初心
風物豈不好
悲來難自任
沙塵暗中原
四海如驚禽
黃屋狩萬

里兩宮隔辰參龍移螻螳窺月晦蟾蜍侵宇宙有傾覆
茲遊豈嶠嶽消憂賴濁醪太息誰能斟

上蔡太師生辰

此首似非全篇

萬古儲英氣生賢鎮廟祧方春回暖律隨帝下神霄早
歲陪興運清忠服邇僚三篇俱說命兩紀獨稱堯為國
隆堂陞中天幹斗杓光華歸史牒寧謚載民謠九牧金
成鼎三山石峙橋元圭來舊錫神寶獻新雕堂起房心
次音諧角徵韶車書人一統符瑞歲千條壁海材逾盛

沙場敵不驕獻琛皆重譯入穀有垂髻郭解雙封國班
超五日朝嘉謀從昔合大業更誰昭眷禮羣臣異恩光
此日饒授圖開地壯傍闕築堤遙供帳移金屋歌鍾實
騎寮名園藏茂密華閣聳峒堯詔蹕迂臨幸宸毫紀宴
招弟兄聯袂繡孫子列蟬貂印琢金為彩魚懸玉在腰
中姻連築沁外族綴塗椒帝子傳盃杓宮嬙侑鼓簫果
新無獨享美美或親調

上蔡太師生辰

宇宙將昭泰風雲必會同帝師黃閣老人羨黑頭公慶
節同堯歷新陰應嶰筒儀昭來彩鳳占夢得真能壽考
天資魯神靈嶽降嵩典儀尊赤鳥歌咏美彤弓夷險無
殊節誠明信保躬濟川先衆楫遵渚集飛鴻炳炳丹青
筆堂堂社稷忠斗杓還列宿簾陛倚層穹文武俱為憲
詩書執此隆規模三代遠謀略萬夫雄字畫諸王品文
章兩漢風早登青瑣闥頻入紫微宮器敏無餘刃才豪
妙吐虹聲光連日月氣槩俯華戎天上經綸合人間制

作工向來凝庶績誰復簡清衷經誦三雍富舟車四海
通地歸銅柱北春滿玉關東養士菁莪盛論才駿馬空
聖時方密勿賢業助昭融螭紐乾符正龍文帝鼎崇伊
尹咸有德房杜不言功禮秩羣臣異恩波此日豐宸章
頒琬琰相第列幘幪東璧文昭爛西崑氣鬱葱節旄藏
祭戟茅土啓龜蒙哀繡卿雲裏貂蟬瑞靄中御奩金寶
帶神廡玉花驄蓬島波全闊天鈞樂未終禁香紛縹緲
朝珮雜玲瓏芝草盈田紫蟠桃照海紅後彫凝秀髮難

老湛方瞳水質期姑射丹砂喚葛洪潛機神宇定眸表
德符充瑞鶴千年羽靈著五色叢舊傳調鼎客今識釣
璜翁世世聯台衮年年拱帝聰欲知者算永元氣等無
窮

司馬禎一首

洛春謠

洛陽碧水揚春風銅駝陌上桃花紅高樓疊柳綠相向
綃帳金鑿香霧濃龍裘公子五陵客拳毛赤兔雙蹄白

金鈎寶玦逐飛香醉入花叢惱花魄青娥皓齒列吳娼
梅粉粧成半額黃羅屏繡幕圍寒玉帳裏吹笙學鳳凰
細綠圍紅曉烟濕車馬駢駢雲櫛櫛瓠蕊杯深琥珀濃
鴛鴦枕鏤珊瑚溢吹龍笛歌白紵蘭席淋漓日將暮君
不見灞陵岸上楊柳枝青青送別傷南浦

司馬棧一首

茅齋

坐見茅齋一葉秋小山叢桂鳥聲幽不知疊嶂夜來雨

清曉石楠花亂流

鄭獬十七首

和御製賞花釣魚

輦路鮮雲五色開
一聲清蹕下天來
水光翠繞九重殿
花氣濃薰萬壽杯
繡幕煙深紅會合
文竿風引綠徘徊
蓬山絕頂無人到
詔許羣仙盡日陪

奉詔赴瓊林苑燕餞太尉文潞公出鎮西都

都門秋色滿旌旗
祖帳容陪醉玉卮
功業迥高嘉祐末

精神如破貝州時匣中寶劍騰霜鏑海上仙桃壓露枝
公子近有登瀛之命昨日更聞褒詔下別刊名姓入蒸彝

田家

田家汨汨流水渾一樹高花明遠村雲意不知殘照好
却將微雨送黃昏

送程公闢給事自青州致政歸吳中

青瑣仙人解玉符秋風一夜滿江湖曾歌郢水非凡曲
未掃旄頭負壯圖終日望君天欲盡平生知我世應無

扁舟應約元宮保瀟灑蓮涇二丈夫

夏

避暑恨無雙羽翰銀河亦恐浪花乾坐來已倦還臨水
臥去無眠復倚欄擬截白雲鋪玉簟好收明月貯金盤
如何一見張公子清論如水灑座寒

送別

何日燕南去平生此別稀定知花已發不及鴈先歸寒
日連雲慘驚沙帶雪飛邊城風土惡換盡別家衣

別

捲衣上馬去，駸駸簷雨飄。
寒楚客心歸路漸，驚紅葉老
舊山已落白雲深。
莊鵬聊欲辭滄海，越鳥終須憶故林。
初啓松阡青未合，嶺頭一望一霑襟。

探春 二首

春盡行人未到家，春風應怪在天涯。
夜來過嶺忽聞雨，今日滿溪都是花。

其二

雪後晴風特地斜
柳條疎瘦未藏鴉
與君試去探春信
看到梅梢第幾花

新春詞

四首

春色應隨步輦還
珠旒玉几照龍顏
紫雲殿下朝元罷
便令東風到世間

其二

春風細拂綠波長
初過層城渡建章
草色未迎雕輦翠
柳梢先學赭衣黃

其三

晴暉散入鳳凰樓
一片朱簾不下鈎
漢殿鬪簷雙彩燕
併和春色上釵頭

其四

小池春破玉玲瓏
聲觸簾鈎漸好風
閒繞闌干搯花樹
春痕已著半梢紅

罷禁林行次南都遇雨二首

毅夫作此詩未久
而卒人頗以為兆

雨聲飄斷忽南去
雲勢旋生從北流
應料涼風消息近

蕭蕭已在樹梢頭

榴火燒空未擬休
忽驚快雨破清秋
晚雲淡淡趁落日
只到楚江南岸頭

送程公闕給事出守會稽兼集賢殿修撰

越州太守何瀟洒
應為能吟住集仙
雪急紫濛催玉勒
日長青瑣聽薰絃
一時冠蓋傾離席
半醉珠璣落彩牋
自恨君恩渾未報
五湖終負釣魚船

鄭猶一首

詠王子安應城新亭

前年諫獵出長楊
今得新亭作醉鄉
好把春衫送酒媪
從教人識御爐香

鄭亦山一首

題邱間壁

醑醑香夢怯春寒
翠掩重門燕子閒
敲斷玉釵紅燭冷
計程應說到常山

張斛六首

蘆臺峭帆亭

高秋客未還何處望鄉關
喬宇蒼烟外孤亭落照間
雨晴山覺近潮滿水如閒
目斷峒陽路歸雲不可攀

沙邊

晚雨漲平堤沙邊獨杖藜
長風催鴈北衆水避潮西
楚客相逢少吳天入望低
故園無路到春草自萋萋

巫山對月懷湖外親友

衆壑斂新雨孤舟增暮寒
巫山今夜月湘水幾人看不

得臨湖醉惟愁下峽難雙魚憑寄遠尺素勸加餐

高寺

高寺鳴鐘後孤舟落鴈邊已知歸遲晚故就上方眠石
峻溜聲急月高松影圓明朝下烟靄回首阻清川

仙門驛聽泉

一亭圍古木雙磴瀉清流行到雲山暮臥聞風雨秋客
塵向人浣病渴此時瘳歸去南溪上輕舟細浪浮

海邊亭為浩然賦

夙有滄洲趣雲烏夢幾回臨深疑地盡望遠覺天開月
湧水輪出濤翻雪陣來無機同海客鷗鳥莫相猜

楊萬里六首

壽皇太子

二首

地出雷初震天昇日更重高飛千里鶴潛躍九淵龍隆
準如高帝虬髯類太宗八荒陰賜裏戶戶是堯封

二

繼照姿天縱分陰學日勤橘中招綺夏瓜處屏伍文老

別漁竿月來依鶴禁雲還將古為鑑聊當野人芹

深閨

深閨寂寞幾輕春自學琵琶曲調新雪滿胡天悲入塞
聲傳漢月遠隨人芳心有怨聲聲促纖指關情字字真
莫向潯陽江上聽空教司馬淚沾巾

閨思

零落迴文織錦梭倚窗殘燭暗銀河陰迷小院秋雲重
響碎空堦夜雨多芳夢已離雕玉被餘香猶在織金羅

白頭吟罷增惆悵幾度相思鬢欲皤

初夏睡起

梅子留酸澣齒牙芭蕉分綠上窗紗日長睡起無情思
閒看兒童捉柳花

凝露堂木犀

夢騎白鳳上青空徑度銀河八月宮身在廣寒香世界
覺來簾外木犀風

楊廷美一首

聞鶯

晚寒顧影惜金衣著意聽時不肯啼
飛入柳陰多去處數聲只許落花知

楊蟠二首

甘露寺

滄江萬里對朱欄白鳥羣飛去復還
雲捧樓臺出天上風飄鐘磬落人間
銀河倒瀉分雙月錦水西來轉幾山
今古冥冥誰借問且持玉爵破愁顏

遊天竺寺次韻酬和契嵩仲晦二人

不問猿崖鳥道深，攜筇着屐伴君尋。
山中桂子驚寒夜，雪後梅花逼歲陰。
欲住更逢青眼顧，相看須盡白頭吟。
他年若續高僧傳，未放湯休與道林。

李昭玘一首

春日遊金明池

日有江湖思，坐無車馬塵。
橫橋自照水，啼鳥不驚人。
輦路晴飛絮，宮門暗鎖春。
多情老園吏，灑地喜相親。

洪朋二首

宿范氏水閣

枕水鑿疏極雲扉夜不扃灘聲連地籟林影亂天星人
靜魚頻躍秋高露欲零何妨呼我友乘月與揚舲

春風

春風吹桃李歛然滿中園羣動不遑息胡蝶紛飛翻我
亦感茲時步履遠林間顏色豈不好持久良獨難置酒
休其下聊復整余歡君看桃與李成蹊亦無言

潘邠老一首

江上晚步

白鳥沒飛烟微風逆上船江從樊口轉山自武昌連日
月懸終古乾坤別逝川羅浮南斗外黔府若何邊

唐庚二首

內前行

內前車馬撥不開文德殿下宣麻回紫微舍人拜右相
中使押赴文昌臺旒頭昨夜光照牖是夕鋒芒如禿帚

明朝化作甘雨來官家喜得調元手周公禮樂未制作
致身姚宋亦不惡我聞二公拜相年民間斗米三四錢

二月見梅

桃花能紅李花白春深何處無顏色不應尚有一枝梅
可是東君苦留客向來開處當嚴冬白者未白紅未紅
只今已是丈人行肯與年少爭春風

林敏功一首

春日有懷

風高收雨急日薄過窗微
梅蕊初迎臘春溪欲染衣
形容今日是遊行昔人非
節物關愁緒歸鴻正北飛

徐俯一首

遊瀾峯

昔年會稽探尚書探得六甲開
山圖載之瀾南天柱山上侵霄漢
下淵泉真人秘語世不傳但見絕頂
蒙雲烟漢武射蛟浮九江舳艫千里
來樅陽築壇祈仙瞻杳茫茂林檜桂
空青蒼石牛一臥叱不起白鹿還歸
深洞裏

二月靈鶴有來時
洞口桃花泛流水

陳洙一首

書御史臺壁

清朝無事諫章疎
多病長年臥直廬
惆悵平生不如夢
春來三度到溪居

周知微一首

觀臨淮雙頭白蓮圖

既不學叔隗
季隗南歸晉
又不學大喬小喬
東入吳一

種桃根與桃葉若為化作雙芙蓉臨淮政成有餘暇坐
令華屋生瀟灑鷺溪一幅萬里寬移得斷江入圖畫天
空水闊江茫茫想見女英與娥皇九嶷雲深蒼梧遠水
姿泣露不成粧苦心抱恨何年了香骨應甘沒秋草不
如回首謝秋風分作尹邢來漢宮

米芾三首

望海樓

雲間鐵甕近青天縹緲飛樓百尺連三峽江聲流筆底

六朝帆影落樽前，幾番畫角催紅日。
無事滄洲起白烟。
忽憶賞心何處是，春風秋月兩茫然。

垂虹亭

斷雲一葉洞庭帆，玉破鱸魚霜破甘。
好作新詩繼桑苧，垂虹秋色滿東南。

東坡往金山作山陸不及陪

久陰陣奪佳山川，長瀾四溢魚龍淵。
衆看李郭渡浮玉，晴風掃出清明天。
頗聞妙力開大施，足病不列諸方仙。

想應蒼壁有垂露照水百怪愁寒烟

王欽臣二首

召試學士院

翠木陰陰白玉堂
長年來此試文章
日斜奏罷長楊賦
閒拂塵埃看畫牆

再宿華岳觀

石壇流水共蒼苔
青竹林間一徑開
可惜梨花飛已盡
前年遊客始重來

王仲衡一首

入直

玉堂晝永暑風微
簌簌飛花落小池
徙倚幽欄頻問訊
雙鶯飛出萬年枝

晏幾道一首

晚春

小白長紅又滿枝
築毬場外好支頤
春風自是人間客
主管繁花得幾時

張公庠一首

道中

一年春事已成空
擁鼻微吟半醉中
夾路桃花新雨過
馬蹄無處避殘紅

吳彥高二首

宿湖城簿廳

日遲風暖燕飛飛
古柳高槐面翠微
卷上疎簾無一事
滿池春水照薔薇

秋興

後園雜樹入雲高
萬里長風夜怒號
憶向錢塘江上寺
松窗竹閣瞰秋濤

葉靜逸一首

遊園不值

應嫌屐齒印蒼苔
十扣柴扉九不開
春色滿園關不住
一枝紅杏出牆來

葉采一首

登山

終日昏昏醉夢間
忍聞春色強登山
因過竹院逢僧話
又得浮生半日閒

王令二首

送春

三月殘花落更開
小簷日日燕飛來
子規夜半猶啼血
不信東風喚不回

有約

黃梅時節家家雨
青草池塘處處蛙
有約不來過夜半
閒敲棋子落燈花

徐元稹一首

湖景

花開紅樹亂鶯啼
草長平湖白鷺飛
風日晴和人意好
夕陽簫鼓幾船歸

曹豳一首

春暮

門外無人問落花
綠陰冉冉遍天涯
林鶯啼到無聲處
青草池邊獨聽蛙

雷震一首

村晚

草滿寒塘水滿陂
山銜落日浸寒漪
牧童歸去橫牛背
短笛無腔信口吹

趙文鼎一首

春詞

碧落初明月未收露花香滴杏梢頭玉闌干外東風軟
人在重雲第幾樓

劉武子一首

立秋

乳鴉啼散玉屏空一枕新涼一扇風睡起秋聲無覓處
滿階梧葉月明中

嚴祭一首

還家

萬屋煙消餘塔身
還家何處想情親
舊時巷陌都忘記
却問新移來住人

游子明二首

釣磯

竹裏茅茨竹外溪
粼粼白石護魚磯
想應日日來垂釣
石上蓑衣不帶歸

畫虎圖

平生射虎裴將軍
馬獐如龍弓百鈞
手撚白玉傍無人

注虎使虎不敢奔須臾叢薄斑斕出人馬不知俱辟易
矢如蓬蒿弓減力將軍得歸幾敗績徐行爪牙原不露
耿耿垂頭若微顧尾剪霜風林葉飛倏忽山頭日光暮
包家畫出真於菟我尚不敢編其鬚昔人作詩譏畫圖
吁嗟畫圖今亦無

邊德舉一首

夢斷

繡枕紅衾曉意濃啼鶯大似不相容夢魂苦恨歸來早

不盡瀛州第一峰

許子靖二首

望少室

名山都不見真形
萬仞盤盤入杳冥
安得雲間騎白鶴
下看三十六峰青

送二道者歸汾州

介休山畔兩閒人
來訪汾陽舊使君
明日却歸塵外去
一雙白鶴上青雲

劉著三首

閨情 二首

天邊北斗又回春，愁絕龍沙任酒醺。
萬里巫山歸夢斷，不知何處覓行雲。

蕙帳金燈冷篆烟，故山春草幾芊芊。
只今惟有瀟湘月，萬里相隨照不眠。

題御城寺壁

一徑埋雲草樹荒，石麟蒼蘚臥田桑。
漢家陵闕今何在。

洛水嵩山滿夕陽

徐以道一首

偶題

老去功名不挂懷
高眠之外只清齋
偶因種竹便多事
風葉掃餘還滿階

任伯起一首

檢院即事

輦路風清蜚早鴉
官卑難趁紫宸衙
了無公事鈎簾坐

一樹冬青落細花

何子翔一首

春寒

博山熏盡鷓鴣斑
羅帶同心不忍看
莫近闌干聽花雨
樓高無處著春寒

夏之中一首

古別離

郎上孤舟妾上樓
闌干未倚淚先流
片帆漸遠郎回首

一種相思兩處愁

宮怨

翠袖無香鏡有塵
一枝花瘦不藏春
十年不識君王面
始信嬋娟解誤人

周彥良一首

題葉靖逸東庵

一庵自隱古城邊
不是山林不市廛
花月半窗霜滿屋
臥聽宰相去朝天

饒良輔一首

竹徑步月

素月流空天不夜清輝散入疎林下下有幽人獨往來
杖藜縹緲誰能畫

舒岳祥三首

登樓

千年日月藏丹鼎萬里乾坤著白頭落水斷虹天渺渺
閒雲倦鳥日悠悠開門碧海通諸島極目青山是別州

我欲再騎黃鶴去回頭還有故鄉愁

古意

客從南方來寄我薰風琴薰風未易致且奏易水吟高
浪忽起立四顧變愁陰征馬立躊躇傍人泪沾襟壯士
不畏死怒髮豎森森長揖辭四座秦關無阻深燕客視
秦王已若置中禽一朝事不成易水有悲音請君且勿
彈此曲傷人心

楊花白

楊花白懊惱隨風度江水將心莫記少年郎少年一行
輕萬里楊條挿地便生根花性飄揚似夢塵恨不築城
高萬丈花飛莫放出重門珠簾繡柱香雲護只有黃鶯
知去路

郭晞宗三首

白紵歌

秋夜遥遥夜未央井梧月白啼寒螿感時念往誰不傷
婕妤寵絕辭昭陽手中團扇篋中藏吳姬織紵秋蟬翼

一絲往還千情積金粟尺量金斗熨為君裁袍為君惜
同盛同衰莫相失

姑蘇臺

春花開秋鴈來長風幾度姑蘇臺不見臺上人臺下月
徘徊一樹梧桐生綠苔

簡蔣通府

野闊風捲沙江空浪翻屋欲渡恨無梁徘徊結心曲

郭磊卿二首

偶題

更無清興在杯觴不用蒲葵扇自涼
月色靜時山鶴叫
一庭秋景藕花香

柳詞

春風垂柳絲只向庭前住妾心逐
征夫萬里天南去柳
枝縱多綿妾夢不知數少年學得
畫雙眉今日看看作
愁具

蔡京二首

保和宮宴留題殿壁

瓊瑤錯落密成林
檜竹交加午有陰
恩許塵凡時縱步
不知身在五雲深

保和西南廡奉詔補句

保和秋殿麗秋輝
詔許塵凡到綺闈
雅燕酒酣添逸興

玉真軒內看安妃

後二句徽宗詩

張惇二首

送別呂子進自中舍出知睦州

籬鷓鴣雲鵬各有程
匆匆相別未忘情
恨君不在蓬窗底
共聽蕭蕭夜雨聲

夢中作

楚峽雲嬌宋玉愁
月明溪淨印銀鈎
襄王定是思前夢
又抱霞衾上玉樓

王明之一首

寫恨

黃金零落大刀頭
玉筯歸期盡到秋
紅錦寄魚風逆浪

碧簫吹鳳月當樓
伯勞知我經春別
香臘窺人一夜愁
好去渡江千里夢
滿天梅雨是蘇州

黃彥輝三首

元宵詞 二首

琥珀盞中雲母鍾
琉璃光射水晶宮
風隨蘭麝香千里
人在蓮花影萬重

鰲頭移得山三島
月下傳來燈萬枝
香陌馬嘶紅萼錦
翠樓人倚綠楊眉

古寺

古寺雲深去路賒
來分僧鉢共生涯
依稀池草成春夢
容易江梅老歲華
長缺悲彈三尺雪
短檠寒落五更花
夜來風雨催歸急
為報河陽令尹家

徐文卿一首

孟明田舍

未嫌衰病出無驢
尚喜冬來食有魚
往事高低半枕夢
故人南北數行書
茅茨獨倚風霜下
粳稻微收鴈鷺餘

欲識淵明只公是邇來吾亦愛吾廬

宋藝圃集卷十四

欽定四庫全書

宋藝圃集卷十五

明 李養 編

徽宗皇帝十八首

宮詞

秦娥從小學宮韶
竊愛僊音逸韻飄
應向鳳臺吹紫玉
夜闌時按白牙簫

細箏百寶間生輝
玉柱成行鴈自飛
對酒仙姿時一按

十三絃上迸珠璣

十里香街沸管絃
金明回馭夕陽天
風輕芝蓋搖霞浪
裊裊龍盤七寶鞭

湘簟涼生暑氣微
午天歌枕向紗幃
轆轤車扇間關處
雙月迴廊彩鳳飛

太清樓畔柳依依
欄外飄飄綠線齊
魚鑰未聞鈴鐸靜
一林鷓鴣占春啼

霽雲高敞九城關
簪佩衣裾一望間
昨日閣門新入奏

降王初綴紫宸班

碧池十二曲欄干
瓊態濃醺倚欲彈
月上海棠清蔭合
羅裳深夜怯春寒

小院風柔蛺蝶狂
透簾渾是牡丹香
玉人不向閒庭看
孔雀雙眠寶砌傍

日上孤稜氣鬱葱
露華猶冷玉芙蓉
錦幃繡幕春花滿
瓊葉珠花影漸重

脩竹成林碧玉攢
幾枝榮茂可棲鸞
瑤宮月白風清夜

誰共庭除一倚欄

金井高梧舞戲圭露盤承潤曉淒淒深宮不是新秋景

昨夜寒蛩漸漸啼

蟾光秋半倍嬋娟河漢潛微潤碧天樓上美人貪醉賞
曉鐘聲斷送經年

三五良宵皓月圓蘭缸寶炬萬家燃樓臺總在水壺裏
今見蓬瀛不夜天

刺花彈篋紫檀弓何處金丸入苑中驚起流鶯花裏去

紛紛如雨落殘紅

杏子成丹乳燕飛柳條搖曳拂漣漪
瑤宮露井殘紅滿
惆悵晴空欲暮時

十花金盞勸仙娥乘興追歡酒量過
燭影四圍深夜裏
分明紅玉醉顏酡

小雨飛輕助燕泥萬花零落柳垂堤
紫清宮裏人稀到
廊上雙雙孔雀棲

朝來和氣已氤氳碧瓦朱甍照眼新
永日更添蓮漏水

晴曦容與蕊宮春

邢居實七首

寄陳履常

十年客京洛衣袂多黃塵所交盡才彥惟子情相親會
合能幾日歡樂何遽央春風東北來飄我西南翔驪駒
已在門白日行且晚停觴不能飲將去更復返把腕將
髭鬚悲啼類兒女人生非鹿豕安得常羣聚朝別河上
梁莫涉關山道匹馬逐飛蓬離恨如春草去去日已遠

行行淚橫臆昨日同袍友今朝異鄉客來時城南陌始
見桃花白回首漢江頭黃梅已堪摘杖策臨高城極目
迥千里落日下青山但見白雲起遠望豈當歸長歌涕
如雨歸心如明月幽夢過潁汝抱膝長相思故人安可
見忽枉數行書彷彿如對面紛紜輦轂下冠蓋爭馳逐
吹噓多賢豪肯復念幽獨空齋聽夜雨深竹聞子規此
情不可道此心君詎知

李伯時畫圖

長安城頭烏欲棲長安道上行人稀浮雲捲盡暮天碧
但有明月流清輝君獨騎驢向何處頭上倒着白接離
長吟搔首望明月不學山翁醉似泥到得城中燈火闌
小兒拍手攔街笑道傍觀者那得知相逢疑似商山皓
龍眠居士畫無比揮毫弄筆長風起酒酣閉目望窮途
紙上軒昂無乃似君不學長安遊俠誇年少臂鷹挾彈
章臺道君不能提攜長劍取靈武指揮猛士驅貔虎明
為脚踏梁宋塵終日飄飄無定所武陵桃源春欲暮白

水青山起烟霧竹杖芒鞋歸去來頭巾好挂三花樹

雨後出城馬上作

既雨天氣佳微雲淡如掃欲尋煙際鐘騎馬河邊草紫
椹飽黃鸝人家夏蠶老田婦踏縲車隔離語音好嗟我
一何愚讀書浪枯槁不及此中人終年客長道

秋風三疊

秋風夕起兮白露為霜草木憔悴兮竊獨悲此衆芳明
月皎皎兮照空房晝日苦短兮夜未央有美一人兮天

一方欲往從之兮路渺茫登山無車兮涉水無航願言
思子兮使我心傷

秋風淅淅兮雲溟溟鳴皋晝號兮蟋蟀夜鳴歲月徂邁
兮忽如流星少壯幾時兮老冉冉其相仍展轉反側兮
從夜達明悵獨處此兮誰適為情長歌激烈兮涕泣交
零願言思子兮使我心忼

秋風浩蕩兮天宇高羣山逶迤兮溪谷寂寥登高望遠
兮不自聊駕言適野兮誰與遊遨空原無人兮四顧蕭

條猿狖與伍兮麋鹿為曹浮雲千里兮歸路遙願言思
子兮使我心勞

明妃引 十四歲作

漢宮有女顏如玉淺畫娥媚遠山綠披香殿裏夜吹笙
未央宮中朝理曲絳紗蒙籠雙蠟燭簫鼓聲傳春漏促
玉輦三更別院歸夜深月照黃金屋蒼苔滿院無行迹
總為君王未相識天上天仙骨格別人間畫工畫不得
嫣然一笑金輿側玉貌三千斂顏色羅幃繡戶掩香風

一朝反嫁單于國金鳳羅衣為誰縷長袖弓彎不堪舞
一別昭陽舊苑花泪洒臙脂作紅雨回頭不見雲間闕
黃河半渡新水滑馬蹄已踏荒徼塵天邊尚挂長門月
黃沙不似長安道薄暮微雲映衰草時聞馬上奏悲笳
綠鬢紅顏為君老西風蕭蕭易水寒啼痕不斷幾闌干
年年看盡南飛鴈一去天涯竟不還少年將軍健如虎
日夕撞鐘搥大鼓寶刀生澁旌旗卷漢宮嫁盡嬋娟女
寂寞邊城日將暮三尺角弓彫白羽安得猛士霍嫖姚

縛取呼韓作編戶

張栻三十二首

采菊亭

并引

陶靖節人品甚高晉宋諸人所未易及讀其詩
可見曾次灑落八窗玲瓏豈野馬遊塵所能棲
集也前建安丞張君精力未衰即挂冠家於瀏
陽有年矣葺小園為亭面南山來求予名予名
之曰采菊取靖節所謂采菊東籬下悠然見南

山鳴呼靖節興寄深遠特可為識者道耳

陶公千載人高標跨餘子豈無濟時念斂蔭獨知止歸
來臥衡門無愠復何喜九日天氣佳東籬擷芳蕊舉頭
見南山佳處正在此地偏心則遠意得道豈否張侯謝
銀魚築室娛燕几小亭方尋丈景物自新美頗聞雙瞳
清亦復強步履不妨數登臨倚杖看雲起高詠悠然篇
飛鴻送千里

中夜祝融觀月

披衣凜中夜起步祝融巔何許水雪輪皎皎飛上天清
光正在手空明浩無邊羣峰儼環列玉樹生瓊田白雲
起我旁兩腋風翩翩舉酒發浩歌萬籟為寂然寄言平
生友誦我山中篇

晨鐘動雷池望日

浮言列下陳天淨澄秋容朝暎何處升彷彿認微紅須
臾眩衆采閭闔開九重金鉦忽湧出晃蕩浮雙瞳乾坤
豁呈露羣物光芒中誰知雷池景乃與日觀同徒傾葵

藿心再拜御曉風

五月十六日夜城南觀月分韻得月字

梅收清風來宇淨寶鑑揭頻年城南遊未有今夜月呼
舟泛微瀾游魚亦出沒危榭倒影浮倚欄涼入骨舉酒
屬西山寒光動林樾諸君興未已南阜上突兀目極大
江流高情更超越

三月七日城南書院偶成

積雨欣始霽清和在茲時林葉既敷榮禽聲亦融怡鳴

泉來不窮湖風起淪漪西山卷餘雲逾覺秀色滋層層
叢綠間愛彼松柏姿青青初不改似與幽人期坐久還
起步堤邊足逶迤游魚傍我行野鶴向我飛敢云昔賢
志亦復詠而歸寄言山中友和我和平詩

展省龍塘有作

十年衡山陰驅馬幾往還山色如故人牧豎隨馬鞍俛
伏長松下清晨涕汎瀾念昔初拱把茲焉影團圓白雲
歸何時日月如轉環矯首祝融峰依前倚高寒於焉百

感集欲去良獨難

寄宇文邛州

書堂何寂寂草樹亦芊芊
子役有王事未暇謀息閒
聊同二三子煮茗蒼崖邊
預作他年約扶犁山下田

七月旦日晚登湘南樓

文書稍去眼日夕進微涼
高樓一徙倚清風為我長
漁父蔭深樾歸人渡浮梁
仰看河漢明俯視羣山蒼
平生會心處於此故難忘
舊聞水東勝巖巒發天藏
豈無一

日暇勇往聊徜徉民瘼未渠補况敢懷樂康天邊雲物
佳似復為雨祥秋成儻可期歲晚或自強當從農家鼓
一厯水雲鄉

靜江歸舟中讀書

南風駕小雨羣山淨如沐吾歸及新涼所厯慰心目
軋柔櫓鳴臥見山起伏推枕意悠然還取我書讀平生
領解處於焉更三復老矣百念疎但欲斯境熟向來五
嶺遊日力半吏牘小心了官事終覺媿惇獨世路自險

夷人情費追逐翩翩孤飛翼息蔭望林麓

題唐興寺湘江亭

寺廢蒼崖聳江回遠岸明風霜摧翰墨

有唐大中記及詩刻兵火後沉

於澤中

歲月老絲緡

寺右有釣磯

兀坐知茶味閒行忘去程長

哦伊水句回首若為情

鄭都官嘗題詩云湘水似伊水湘人非故人

過湘潭劉信叔舊居有感

北渚留行客東陵憶舊侯池蓮半枯折風葉正颼颼事

業留千載英雄去一丘平生許國志歲晚詎悠悠

多景樓

疇昔南徐地登臨北固樓平原迷故國滄海接江流木
落烟沙晚城孤鼓角秋寄言鷗鷺侶吾已具扁舟

重陽前一日

九日明朝是清樽強自開蕭蕭疎雨暗滾滾大江來野
菊閒無數沙鷗靜不猜何須騎馬飲此興亦悠哉

隔牆聞正父鄉飲甚樂偶畏風不預用前韻敬簡
元日忻晴色新年祇舊心故人同客裏鄉話自情深儘

說成都酒休為楚澤吟相逢須痛飲歲月易侵尋

送曾裘父

交舊間何闊能來浹日留還尋佳橘頌惜別仲宣樓探

古書盈屋憂時雪滿頭絕思黃閣老招隱意綢繆

樞密劉公

嘗欲以遺逸舉裘父

中秋與僚佐登江陵郡城觀月

涼意今年早蟾光七澤多憑欄共懷古擁袂獨高歌風
物關山遠功名歲月過一樽聊復爾於此興如何

題城南書院八詠

新竹成林蕉葉清
隔籬深處有蟬鳴
晚涼更覺長堤靜
自遶荷花待月明

林塘過雨不勝秋
萬蓋跳珠瀉碧流
倚檻孤吟天欲暮
更穿芒屨上方舟

晚來天氣更清新
獨倚闌干正暮春
花落花開鶯自語
東風吹水細粼粼

陰陰松竹影自轉
午枕無人到北窗
何許狂風來動地

夢回波浪淘春江

睡覺西山月正平
荷香不斷曉涼生
園中雙鶴知人意
已作金風警露聲

四面紅蕖鏡綠波
晚涼奈此野情何
憑城更覺看山穩
入戶還欣得月多

訪羅孟弼竹園

林深谷窈路詰曲
慘澹西山橫遠青
想得天寒來獨倚
空雲髣髴下湘靈

城南即事

一春風雨水平湖更覺湖心月榭孤坐看百花開落遍
依然山色對青廬

桃花塢

花開山與明花落水流去行人欲尋源只在山深處

山齋

疊石小崢嶸脩篁高下生地偏人跡罕古井輓轡鳴

西嶼

繫舟西岸邊幅巾自來去島嶼花木深蟬鳴不知處

梅堤

亭亭堤上梅歷歷波間影歲晚憶夫君寂寞烟波靜

采菱舟

散策下亭阿水清魚可數却上采菱舟乘風過南楚

長橋

西風吹短鬢復此渡長橋木落波空闊亭孤影動搖徘徊念今昔領略到漁樵聞有山中隱憑誰為一招

嶽頂上封寺有懷元晦

憶在朱夫子登臨水雪中
劇談無俗調得句有新功
別去鴈橫浦重來月滿空
遙憐今夕意清夢倘相同

謁陶唐帝廟詞

溪交流兮谷幽山作屏兮層丘木偃蹇兮枝相樛
皇何為兮於此留謁冠佩兮充庭潔芳馨兮載陳
純衣兮在御東風吹兮物為春皇之仁兮如天四
時序兮何言出門兮四顧渺宇宙兮茫然

題劉氏綠映亭

涼葉翻翻不受塵
芒屨藜杖及清晨
開簾小放前溪入
澄綠光中獨岸巾

劉子翬五十六首

懷致中

夢覺殘夜永
山寒氣逾清
林幽萬籟息
月出虛堂明
披衣坐復起
懷人思空盈
經時不對面
素榻浮埃生
遙知念盍簪
臨風亦關情
褰帷望岐路
慨然欲宵征
無人導

我先何因識門庭仰憑鴻鴈飛書詞寫深誠詞多意莫
宣益遣幽恨并

棄竹夫人

愛憎情易遷感物思鬱紆念昔未棄捐嘗侍君子居煩
襟一披豁雅抱何清虛蹉跎怨時暮涼德竟見疎飛霜
皓中庭枵然委牆隅的皪珠幃深熒煌錦茵鋪豈不懷
舊恩君心已非初當年紈扇揺抱恨同區區

聞箏

月高夜鳴箏聲從綺窗來隨風更迢遞縈雪暫裴回餘
音若可玩繁絃互相催不見理箏人遙知心所懷寧悲
舊寵棄豈念新期乖含情鬱不發寄曲宣餘哀一彈飛
霜零再撫流光頽每恨聽者稀銀甲生浮埃幽幽孤鳳
鳴衆鳥聲難諧盛年嗟不偶况乃容華衰道同符片諾
志異勞羣媒栖栖牆東客亦抱凌雲才

一樹

一樹梅開早清香襲客衣夕陽簫鼓散半是折殘枝

偶步

偶步忘歸遠
心閒逸興增
山深知有寺
日暮不逢僧

春夜

樓迴星河轉
宵殘鼓角催
重門知月鎖
寒夢遶花回

雜題二首

簷溜停清瀉
林聲息怒號
水浮秋色遠
山帶夕陽高

二

宿鴈猶驚渚
昏鴉已着林
野平雲散亂
江動月浮沉

酴醾

獨立幽亭晚春風
玉一圍殘英不著地
去作嶺雲飛

屏山

南溪枕山流潤氣
滋林麓夢破午窗
清清風在寒竹

贈周宗寅

我車南君車北
相逢總是天涯客
擁爐談笑一燈殘
出門風雨千山隔

清江引

漁翁一棹老清波
稚子學語能漁歌
日暮沙頭寒執竹
雨餘船角亂堆蓑
鸞殘小鮮仍自膾
湖海茫茫醉鄉內
夜闌酒渴嗽寒流
月照蘆花上蓬背

萊孫引

屯田詞考功詩白水之白鍾此竒鈎章棘句凌萬象
逸興高情俱一時者卿骨朽士特死澗谷錯莫無晶
輝后生俊秀何其寡吾宗喜有萊孫者雙瞳點漆面
如水一見使我心神寫讀書已通經學賦已知律只
今年十二

吐氣成五色驪珠出海夜生光
突竒流弦追莫及人材
有價誰能私不妨乃翁聊譽兒
囊中彩筆今付汝往繼
二妙聲名馳

出郊

路轉囊山北扶輿憶舊過
乾坤征戰久遊宦別離多
瘴樹餘紅葉春江又綠波
平生豪橫氣未老半消磨

秋懷

杖藜幽興出佳處每關情
白石溪流淺黃花籬落清林

烟經雨薄野日傍山明
賴有杯中物愁懷得暫平

道中

微風收宿靄細路遠平臯
石亂春流急山寒曉月高
鳥聲時出樹花氣欲侵袍
行役兼清賞馳驅未覺勞

寄蜀

有客傳歸信愁懷得暫寬
兒童占鵲喜隣里借書看
離蜀秋方半浮湘歲欲闌
柴門頻洒掃夢想見征鞍

野墅

野墅驚秋晚殘年忽忽過海潮通井淺林日到窗多酒
盡隣翁餉詩成稚子哦人生行樂耳軒冕奈予何

訪原仲山居

寂寂臨湖屋湖風為掩門鳥聲幽谷樹山影夕陽村好
事常留客雖貧亦置尊平生枯淡意去此欲誰論

與致堂對榻

勝會常連榻還欣與子同一燈寒夜永殘夢雨聲中道
舊驚身老談玄予性空卜隣今有約泉石興何窮

登原仲茅亭

茅簷聊徙倚落日見樵蘇過鴈飛何急寒山遠欲無劇
談容謾叟逸興慕潛夫寸祿甘華髮人生底事愚

寄張子平

老矣張平子飄然客此州清尊如有伴白髮不知愁雨
燕捎簾入風花擁檻浮夢中家在否歸興莫悠悠

訪士持舉和四六叔詩因次其韻

聞道歸舟泊淺沙籃輿出郭日初斜新傳詞賦來梁苑

舊識芝蘭向謝家
遣興只憑尊有酒
感時空見樹飛花
相逢未款還相別
回首長亭鬢欲華

劍潭贈李似表

夜窗把酒對鷺峰
分手悠悠各轉蓬
艤棹相逢烟水際
有家常在亂離中
邊庭久失清河地
壯士誰收赤壁功
他日著鞭先後耳
飄零不用嘆塗窮

過東橋

小箔鳴機幾萬家
時清猶想舊繁華
樓臺夜映雙溪月

簫鼓春迷後坂花回首十年真夢寐停驂四顧但風沙
却過蕭寺無人語獨對枯林數暝鴉

懷遠

樓北樓南烟岫遮水光秋色淡無涯風驚枯葦連村雨
霜著寒楓滿樹花故人悠悠絕雙鯉別恨耿耿聞悲笳
索居懷抱誰同寫古調一吟青鬢華

新灣

萋萋寒生水面烟吳歌唱罷月微偏停橈又向灣前宿

卷十五
一夜西風浪打船

汴堤

參差歌吹動離舟
宮女張帆信浪流
轉盡柳堤三百曲
夜橋燈火看揚州

景陽鐘

景陽鐘動曉寒清
度柳穿花隱隱聲
三十六宮梳洗罷
笑吹殘燭待天明

兩山

溪南溪北兩山遙，隔岸行人手可招。
日暮海嶠烟雨黑，一川舟楫趁歸潮。

悠然堂和致堂絕句

清霜一夜到蒹葭，放出湖光徹遠沙。
漠漠浮烟收欲盡，晚風輕浪蹴銀花。

絕句

目送歸鴻獨倚樓，晚風吹淚更橫流。
蕉花落盡蠻烟碧，六十三程是白州。

汴京紀事

十首

卷十五

御路丹花映綠槐
瞳瞳日照五門開
吾皇欲與民同樂
不惜千金築露臺

朝廷植黨互相延
政事紛更屬紀年
曾讀上皇哀痛詔
責躬猶是禹湯賢

神霄宮殿五雲間
羽服黃冠綴曉班
詔許羣臣親授錄
步虛聲裏認龍顏

萬炬銀花錦繡圍
景龍門外軟紅飛
淒涼但有雲頭月

曾照當時步輦歸

橋上遊人度鏡光
五花殿裏奏笙簧
日曛未放龍舟泊
中使傳宣趨鄆王

天廡龍媒十萬蹄
春池蹴踏浪花飛
路人爭看蕭衙內
月下親調御馬歸

梁園歌舞足風流
美酒如刀解斷愁
憶得少年多樂事
夜深燈火上樊樓

盤石曾聞受國封
承恩不與幸臣同
時危運作高城礮

猶解捐軀立戰功

河漢如雲掃汰寥丁東寒鐵響清宵竹牕驚破高人夢
門外駸駸萬馬朝

輦轂繁華事可傷師師垂老過瀟湘縷衣檀板無顏色
一曲當時動帝王

得天台命

暖風環珮滿芳洲貝闕珠宮憶舊遊此日劉郎心似水
桃花空遶暮溪流

送巨山

二年寄跡閩山寺一笑翻然向浙江
明月不知君已去夜深還照舊書窗

送元仲

惆悵回車不可攀故廬猶得及春還
遙知去路風烟好看盡閩山看越山

有懷 十首

滿空寒雨雜飛烟湖上先生擁褐眠
借問茅齋容客否

夜燈相伴讀韋編

結茅同隱水雲間
何日柴車不往還
憶得松林長嘯罷
歸來明月徧秋山

山空墜石咽寒溪
雨濕浮雲晚更低
不見蕭屯劉處士
年年清夢遶瓜畦

當年冊府仰才華
一跌青雲萬里賒
白首却來蓮社裏
幅巾緇褐誦楞伽

風驚枯葦白花浮
欲下橫橋晚更留
惆悵不逢吳季子

一溪寒水帶烟流

青錢學士妙文章便合含毫侍帝旁
寂寂閩山餘舊隱憶君時到讀書堂

松底柴門盡日關主人西去幾時還
長鑱委地黃精老時有寒猿嘯硯山

馬蹴浮埃去路長相逢端欲問行藏
未饒赤壁風流在且向何家醉碧香

翁侯滿腹是精神三謁金門計未成
却跨蹇驢遊雪上

秋風雄劍匣中鳴

曾訪高人上碧峰至今清興逐松風
籃輿夢想山行處
白葛花開烟雨

題王巖起樂齋

數叢脩竹擁高居興味翛然樂有餘
午枕睡酣窗寂寂
清風來去自翻書

宋藝圃集卷十五